

# Dapli cussegliaziun en in ambient modern

## Reavertura da la BCG Scuol ils 13 da matg 2019

Scuol, ils 13 da matg 2019 – Suentar ina fasa da renovaziun da set emnas è oz glindesdi vegnida averta la nova sedia regiunala da la Banca Chantunala Grischuna (BCG) a Scuol. Las clientas ed ils clients spetga ina halla da clientella cumpletmain nova ed ina cussegliaziun cumplessiva. Gist ils 14 da matg cumenza la renovaziun da la BCG San Murezzan. La filiala vegn puspè averta il 1. da fanadur 2019.

La BCG ha modernisà sia [sedia regiunala a Scuol](#) ed adattà ella als novs basegns da la clientella. Richard à Porta, manader da la regiun Scuol, e ses team porschan a las clientas ed als clients anc adina l'entira paletta da servetschs da banca. Da quella fan part la cussegliaziun d'investiziuns e l'administraziun da la facultad sco era soluziuns individualas per dumondas da finanziaziun e provediment. Igl è era vinavant pussaivel da reglar simpels affars da banca sco empustar cartas e far pajaments.

### Nova halla da clientella sco lieu d'inscunter

La nova sedia regiunala na dispona da nagins spurteglis classicis pli. Enstagl da quels è vegnida installada en la nova halla da clientella ina recepziun moderna e centrala. Las clientas ed ils clients vegnan retschavids en in'atmosfera agreabla e discreta: ils cussegliaiders sa movan libramain e beneventan a moda directa las clientas ed ils clients. In chantun cun lounge envida da far ina pausa e vegn nizzegià per tgirar il contact cun la clientella. En questa moda po la BCG sa posiziunar sco banca da cussegliaziun moderna. «Grazia al nov concept da filiala essan nus anc pli damanaivel da nossas clientas e da noss clients ed avain dapli temp per la cussegliaziun persunala», sa legra Richard à Porta. En la sedia a Scuol lavuran 15 persunas.

Cun ses nov concept da filiala reagescha la BCG sin ils basegns da la clientella ch'èn sa midads ils ultims onns. Adina dapli clientas e clients reglan ils affars da banca sur ils chanals electronics. En las filialas vegnan els surtut per cussegliaziuns persunalas. Las transacziuns als spurteglis èn sa reducidas ils ultims sis onns per var tschuncanta pertschient.

### Automats moderns

Per simpels affars da banca stattan a disposiziun en la sedia regiunala a Scuol apparats multifunzionali che porschan ils suandants servetschs: far pajaments e retrair daners en francs svizzers ed euros cun scumpartiziun da las notas tenor giavisch, transportar daners d'in conto a l'auter sco era consultar il saldo dal conto. En cas da basegn sustegnan ils cussegliaiders a la recepziun las clientas ed ils clients. Ordaifer ils temps d'avertura èn ils automats accessibels en la zona da 24 uras.

### Il contact persunal stat en il center – dapli soluziuns digitalas

La BCG Scuol è averta da glindesdi fin venderdi, da las 08.00 fin las 12.00 e da las 13.30 fin las 17.00. «Discurs da cussegliaziun individual èn pussaivels sin dumonda betg mo en las localitads da la banca, mabain er a chasa tar las clientas ed ils clients», accentuescha Richard à Porta. A medem temp investescha la BCG en sias purschidas digitalas per simplifigar ils affars da banca. Exempels èn il [center da clientella](#), nua ch'ils clients pon empustar online daner contant che vegn tramess a chasa per posta u era fixar in termin da cussegliaziun. Dapli davart las soluziuns online per reglar ils affars da banca da tuttas uras chatt'ins sin [gkb.ch/digital](http://gkb.ch/digital).

**La renovaziun a San Murezzan cumenza**

In di suenter l'avertura da la BCG Scuol cumenza la modernisaziun da la halla da clientella a [San Murezzan](#). Dals 14 da matg fin ils 28 da zercladur 2019 vegnan las clientas ed ils clients servids en in provisorio al medem lieu e quai sco usità da glindesdi fin venderdi, da las 08.30 fin las 12.00 e da las 14.00 fin las 17.30. La nova BCG San Murezzan vegn averta il 1. da fanadur.

**Contact per ils collavuratur da medias:**

Banca Chantunala Grischuna, Medias & Investor Relations, chascha postala, 7001 Cuir

Thomas Müller, [thom.mueller@gkb.ch](mailto:thom.mueller@gkb.ch), telefon +41 81 256 83 11

Nadja Maurer, [nadja.maurer@gkb.ch](mailto:nadja.maurer@gkb.ch), telefon +41 81 256 88 01

La Banca Chantunala Grischuna sin:

[gkb.ch/medien](http://gkb.ch/medien) | [Twitter](#) | [Facebook](#) | [Instagram](#) | [YouTube](#) | [Flickr](#) | [Xing](#)

---

**Banca Chantunala Grischuna – il leader en il Grischun**

La Banca Chantunala Grischuna porscha tut quai ch'i' dovra per ina banca universala moderna – per persunas privatas, l'economia ed il maun public. La banca occupa 1'009 collavuraturas e collavuratur (stadi dals 31.12.2018). En il chantun Grischun cun sias numerusas vals e pliras linguas, è l'interpresa represchentada cun 52 agenturas, la sedia principala sa chatta a Cuir. La Banca Chantunala Grischuna è participada a la Banca Privata Bellerive SA a Turitg ed a la Albin Kistler SA a Turitg. En il resultat annual preschenta ella cun ina summa da bilantscha da CHF 26.5 milliardas in gudogn dal concern da CHF 185.1 milliuns. Il scrit da participaziun BCG è quotà a la bursa dapi ils 10 da settember 1985.

**Termins**

|                              |                    |
|------------------------------|--------------------|
| Rendaquint semestrial 2019:  | 25 da fanadur 2019 |
| Quint annual 2019:           | 7 da favrer 2020   |
| Radunanza dals participants: | 25 d'avrigl 2020   |

---